

Österreich Zu lehen sein, durch meiner Vleyssigen getrewen Pete wegen genedicklich verlihen hat nach laut seiner gnaden brief, mir darüber gegeben, Also das Ich vnd die obgenanten meine Brüder vnd Vnne Erben Manns Namen die Nu furbazzer mit Iren Zugehörungen von seinen gnaden vnd seinen Erben in lehenweyse Ynnhaben, Nutzen vnd niessen sullen Vnd mugen, als lehenss vnd lanndsrecht ist, vnd wir sullen vnd wellen auch seinen gnaden alletzeit dauon getrew gehorsam dinstlich vnd gewerttig sein, als lehensleut Iren lehenherren schuldig vnd gepunden sind, alss Ich dan solchs Zetün seinen genaden gelobt vnd gesworen Hab, doch seinen gnaden vn männcklichs Rechten HierlInn vnnvergriffenlich vnd an schaden anguerde.

Vnd sind das die Stuckh vnd Gütter: Item von Erst den dinckhof Zü wyttnew mit aller seiner Zugehorung, daz ist Bolswiler das Sloss, vnd die dörffer Bolswyler, Selden, Biezikhofen, wytnaw vnd Aw mit Gericht vnd leuten, Zwynng, Pannen vnd mit namen den Kyrchensatz wytnaw.

Item die Zynns Zu Hyrtzmatten vnd die gütter Im weylerspach, alsdann Vnser Vorfaran die ynngehabt vnd Herbracht Haben.

Item die wildpann Zu Bolswyler vnd in anderen vnnsern Gerichten mit Perckhwerch, vischentzen, von Hawenstain pis herüber an der von Stauffen wildpann, vnd der wasserseyhen Hinauff vntz auff die diesselmüt, vnd bey Hanns Pruckhers Hauss vberab pis gen oberried Zu der üblbrugken, vnd Zu der andern seyten an den Schönberg Hynumb an Vffhewser Pann, vnd darüber vntz an den Brunberg mit namen die Wyldpenn an dem Prunberg mit dem Berckhwerch vnd aller Zugehörde, Zü baiden seyitten Hinein vntz Zü der Vblbruckgen, vnd was auch wyldpenn Zwischen den geschaiden gelegen sind, gehörend in das Lehen. – Mit Vrkund ditz briefs, den Jch seinen gnaden darumb endgegen gib, versigelt mit des Edlen vnd Strenngen Ritters, herrn pettern von Mörsperg aigen furgedruckhten Insigl, der das durch meiner Vleyssigen pete willen zuendt der geschriff gedruckht Hat, doch Im vnd seinen Erben an schaden, des sind Zeugen der Edl Her Martin freyher Zu Stauffen vnd der vest, fürsichtig vnd weys Sigmund von Hofen vnd Thoni Prun, Schultheis zu Ensisheim, Geben Zu Jnnsprugk an Samstag vor dem Sunntag vocem iocundatis Nach kristi gepurde Vierzehenhundert vnd dem Zwayvndsibentzigisten Jare. (Siegel)

18) 1472 Sept. 24 (GLA 44/ 9099). Wir, Rüprecht von gottes gnadenn Bischoff zû Straßpurg, phaltzgrauenn By Rin ec. vnnd lantgraue Zü elses Erkennenn vnnd tûn kunt offenbar mit disem brieffe, das Wir, von vnnser vnd vnnser stift Straspurg wegenn vnnsern liebenn getruwenn Hannsen Snewelin bernlapp von Boßwyler von sin, auch Jorgen, Friderichen und Gabriel, alle Snewlin bernlapp von Boßwyler, siner brueder vnd Jrer Lehenserben wegenn sollichs Harnoch geschribenn, so dann Jr Vatter vnd voraltern seligen von vnnsern vorfaren vnd Stiffit Straspurg zû lehenn gehabt hant:

Zum Ersten den Burgstadel Zü Birgkenberg Im brisgowe gelegenn mit siner Zü gehorde, nemlich das wedel gnant Waltemberg.

Item desglichen diß hie noch geschribenn acker vnd matten:

Zum ersten dritthalp Juchart acker am eychacker

Item ein Juchart In der binnen Zü Inickhofen

Item drye Juchart am Rübeacker